

Կ. Ա. ՀԱՐՈՒԹՅՈՒՆՅԱՆ

Սովետական բանակի ազգային զորամասերի տարեգրության մեջ իր արժանի տեղն ունի Կ. Ե. Վորոշիլովի անվան Հայկական 76-րդ կարմրադրոշ լեռնահրաձգային դիվիզիան, որը ծնվել է Հայաստանում սովետական իշխանության հաստատման համար մղված պայքարում, կոփվել քաղաքացիական կռիվներում, առնականացել խաղաղ շինարարության տարիներին և փառապանծ մարտական ուղի անցել Հայրենական մեծ պատերազմում:

Դիվիզիայի շարքերում են աճել ՍՍՀՄ զինված ուժերի ճանաչված զորահրամանատարներ, Սովետական Միության մարշալ Հ. Ք. Բաղրամյանը, զրահատանկային զորքերի մարշալ Հ. Խ. Բաբաջանյանը, շուրջ 50 գեներալներ և Սովետական Միության նույնքան հերոսներ, մի քանի հազար սպաներ, 30 հազար շքանշանակիրներ և մեդալակիրներ:

Հայկական 76-րդ դիվիզիան կազմավորվել է 1922 թ. սեպտեմբերի 5-ին առանձին հայկական հավաքական բրիգադի հիման վրա, որն ստեղծվել էր Հայաստանում սովետական իշխանություն հաստատվելուց հետո¹:

Իր կազմավորման առաջին օրվանից Հայկական 76-րդ դիվիզիան գտնվել է կուսակցական և պետական օրգանների ուշադրության կենտրոնում: Դեռևս 1923 թ. փետրվարին ՀԿ(Բ)Կ II համագումարը բանաձև ընդունեց հայկական դիվիզիայի մասին, որտեղ առաջարկվում էր կարգավորել զինծառայողների ընտանիքներին ցույց տրվող նյութական օգնության հարցը, հրամաքակազմի իրավունքը բարելավելու նպատակով բաց թողնել անհրաժեշտ միջոցներ, կարմիրբանակայինների անգրագիտությունը վերացնելու նպատակով դիվիզիայի քաղբաժնի տրամադրության տակ դնել ուսուցիչներ, ակտիվացնել զորամասերում տարվող կուլտուր-շեֆական աշխատանքները և այլն²: Նույն թվականի սեպտեմբերի 24—26-ին տեղի ունեցած ՀԿ(Բ)Կ Կենտկոմի պլենումը որոշում ընդունեց 1902 թ. ծնված կոմունիստներին ու կոմերիտականներին ժամկետից շուտ բանակ զորակոչելու, ինչպես նաև հրամանատարական ու քաղաքական դասընթացների համալրման գործը կարգավորելու մասին³:

Հայկական դիվիզիայի կազմավորման, մարտունակության ամրապնդման գործում կարևոր դեր խաղաց ՀՍՍՀ Ժողկոմսովետի նախագահ և ռազմժողկոմ Ա. Ֆ. Մյասնիկյանը: Նրա նախաձեռնությամբ Երևանում կազմակերպվեց ռազմական դպրոց, որը դարձավ մարտական կադրերի պատրաստման դարբնոց⁴: Դիվիզիայի մարտունակության ամրապնդման գործում կարևոր դեր

1 ՍՍՀՄ պաշտպանության մինիստրության արխիվ (այսուհետև՝ ՍՍՀՄ ՊՄԱ), ֆ. 51 գվարդիական հրաձգային դիվիզիայի (այսուհետև՝ ԳՀԴ), ց. 1, գ. 2, թ. 1:

2 ՍՄԿԿ Կենտկոմին կից մարքսիզմ-լենինիզմի ինստիտուտի հայկական մասնաճյուղի արխիվ (այսուհետև՝ ՄԻ արխիվ), ֆ. 1, ց. 2, գ. 6, թթ. 23—24:

3 Նույն տեղում, ց. 1, գ. 11, թթ. 10—13:

4 Տե՛ս «Բանբեր Հայաստանի արխիվներ», 1971, № 3, էջ 121—134:

խաղաց նաև քաղաքացիական կռիվների լեգենդար հերոս Հայկ Բժշկյանը (Գայ), որը իր ամբողջ գիտելիքներն ու ռազմական հարուստ փորձն ի սպաս դրեց հայկական դիվիզիայի կոփման ու ամրապնդման գործին:

Դիվիզիան իր կազմավորման առաջին իսկ օրից շրջապատվեց համաժողովրդական հոգատարությամբ: 1922 թ. քաղաքացիական կազմակերպությունները ստանձնել էին դիվիզիայի շեֆությունը: Այդ աշխատանքը գլխավորում էր շեֆությունն (նախագահ՝ ՀՍՍՀ Կենտգործկոմի նախագահ Սաքո Համբարձումյան)⁵: Շեֆական աշխատանքներն էլ ավելի էին մերձեցնում բանակը ժողովրդի հետ:

Դիվիզիայի մարտական և քաղաքական ուսուցման աշխատանքները կանոնավոր հիմքի վրա դնելու գործում կարևոր դեր խաղացին դիվիզիայի քաղաքափնը, զորամասերի քաղաքարատները, կուսակցական և կոմերիտական կազմակերպությունները:

Դիվիզիայի անձնակազմի մարտական պատրաստության, քաղաքական ուսուցման, կուլտուրական կյանքի ու կենցաղի կազմակերպման հարցերում կարևոր դեր են խաղացել քաղաքափնի օրգան «Կարմիր զինվոր» թերթը, «Կարմիր մարտիկ» ռազմա-քաղաքական հանդեսը⁶, գնդերի կուսկազմակերպությունների «Կարմիրբանակային թերթը» (I և II գունդ), «Կարմիր երկրային» (III գունդ), «Գրոհ» (Հեծյալ գունդ), «Որոտ» (Հրետանային գունդ) բաղմատիրաժ թերթերն, ինչպես նաև զորանոցների կարմիր անկյունները (1924 թ. հունվարի 21-ից կոչվել են լենինյան անկյուններ), գնդային ակումբները, կարմիր բանակի տները:

Հայկական դիվիզիան ակտիվ մասնակցություն է ունեցել կուլտուրական հեղափոխության և սոցիալիստական շինարարության աշխատանքներին: Հատկապես մեծ հաջողություններ ձեռք բերվեց կարմիրբանակայինների անգրագիտության վերացման գործում: Դիվիզիայի քաղաքափնը կուլտուր-լուսավորչական աշխատանքներ ծավալեց նաև գյուղում, քանի որ, ինչպես նշել է Վ. Ի. Լենինը, «բանակը հանդիսանում է գիտակցականության լավագույն տարածողը գյուղացիության շարքերում»⁷: Դիվիզիայի շինարարական բրիգադները ակտիվ մասնակցություն ունեցան նաև Շիրակի ջրանցքի, Երևանի, Քանաքեռի, Ջորագետի հիդրոէլեկտրակայանների, Կիրովականի քիմկոմբինատի, հանրապետության ժողովրդական տնտեսության մյուս առաջնեկների կառուցման գործում: Նրա զորամասերում բացված դասընթացներում կարմիրբանակայինները ձեռք էին բերում տարբեր մասնագիտություններ և զորացրվելուց հետո համալրում բանվոր դասակարգի և կոլտնտեսային գյուղացիության շարքերը: Միայն 1930 թ. այդ դասընթացներն ավարտեցին 1396 կարմիրբանակայիններ, որոնք ստացան տրակտորիստի, ռադիստի, ճանապարհաշինարարի, հաշվետարի և այլ մասնագիտություններ⁸:

⁵ ՀՍՍՀ Հոկտեմբերյան հեղափոխության և սոցիալիստական շինարարության պետական կենտրոնական արխիվ (այսուհետև՝ ՀՍՍՀ ՀՀՍՇ ՊԿԱ), ֆ. 688, ց. 2, գ. 2, թթ. 8—10:

⁶ Հանդեսը լույս է տեսել 1923—1925 թթ.: Այն կոչվել է նաև «Պահակ», «Հեղափոխության պահակ»:

⁷ Վ. Ի. Լենին, Երկեր, հ. 31, էջ 136:

⁸ Սովետական բանակի պետական կենտրոնական արխիվ (այսուհետև՝ ՍՊԿԱ), ֆ. 216, ց. 2, գ. 307, թթ. 111—112:

Դիվիզիան սկստիվորեն մասնակցելով Սովետական Հայաստանի սոցիալիստական վերակառուցման և կոլտուրական շինարարության աշխատանքներին, միաժամանակ, բարձր հիմքերի վրա պահեց իր մարտական պատրաստությունը։ Այդ ասպարեզում մեծ աշխատանք կատարեցին դիվիզիայի բազմաթիվ հրամանատարները։ Նրա անձնակազմի մարտական և քաղաքական ուսուցման ընթացքում մեծ ուղադրություն էր դարձվում մարտիկների տեսական և գործնական պատրաստության վրա։

1926 թ. ամառային միացյալ հավաքում Կովկասյան կարմրագրոշ բանակի (այսուհետև՝ ԿԿԲ) ազգային ռազմական դպրոցների միջև կազմակերպված հրաձգային մրցումներում առաջին տեղը գրավեց Ա. Ֆ. Մյասնիկյանի անվան հայկական միացյալ ռազմական դպրոցը։ Անհատական մրցումներում բացարձակ չեմպիոն դարձավ այդ դպրոցի սան Բ. Ի. Առուշանյանը (հետագայում դեներալ-լեյտենանտ)⁹։ Նույն տարում, դարձյալ հրաձգության գծով, ամբողջ ԿԿԲ-ում առաջին տեղը գրավեց ՀՀԴ-ի Լ. Մխչյանի անվան I հրաձգային գունդը¹⁰։ Հաջորդ տարում, ինչպես նշել է ԿԿԲ-ի հրամանատար Մ. Կ. Լեանդովսկին, «Հայկական դիվիզիան, համեմատած անցյալ տարվա հետ, ձեռք է բերել խոշոր նվաճումներ։ Այն պարապմունքները, որոնց ես ներկա էի (տազնապ, գիշերային երթ, ճամբարային ամենօրյա ուսուցում և այլն), լիովին ապացուցում են իմ այդ հիմնական եզրակացությունը»¹¹։

Նույն թվականի հուլիսին ՀՀԴ-ի հրետանային զնդի Ա. Բոյաչյանի հաուբիցային մարտկոցը ԿԿԲ-ի հատուկ հրետանային հավաքի մրցումներում հաղթող ճանաչվեց և արժանացավ լավագույնի կոչման՝ ստանալով ՍՍՀՄ ՌՆԽ-ի անվան երրորդ կարգի պարգև¹²։ Այդ նույն հավաքում աչքի ընկան նաև ՀՀԴ-ի հրետանային 10-րդ հաուբիցային մարտկոցը՝ Կարապետ Հախնազարյանի (հետագայում հրետանու դեներալ-մայոր), 9-րդ հաուբիցային մարտկոցը՝ Տիգրան Գյուլբուդաղյանի (այժմ պաշտոնաթող զեդապետ) հրամանատարությամբ, որոնք նույնպես ստացան ՍՍՀՄ ՌՆԽ-ի անվան պարգևներ¹³։ Հրաձգության գծով առաջին տեղը գրավեց ՀՀԴ-ի Լ. Մխչյանի անվան 1-ին հրաձգային գունդը (հրամանատար՝ Ն. Զ. Դոնդարյան, զինկոմ՝ Խ. Հ. Աբրահամյան)¹⁴։ Աշնանը տեղի ունեցած զորախաղերը ցույց տվեցին միավորման մարտական պատրաստության բարձր մակարդակը։ Այդ զորախաղերում ՀՀԴ-ն հրացանով կրակելու գծով ամբողջ ԿԿԲ-ում գրավեց առաջին տեղը¹⁵։

30-ական թվականների սկզբներին դիվիզիան լեռնային պայմաններում անցավ զորքերի պլանային ուսուցմանը¹⁶։ Տակտիկական պարապմունքների ընթացքում մեծ ուղադրություն դարձվեց լեռնային արգելքների հաղթահարմանը և մարտական տեխնիկական դժվարին պայմաններում օգտագործելուն։

Մարտական և քաղաքական ուսուցման բնագավառում դիվիզիայի ձեռք բերած հաջողությունները բարձր են գնահատվել հրամանատարության և կա-

⁹ Տե՛ս «Կարմիր զինվոր», 5. VII. 1926:

¹⁰ ՍՐՊԿԱ, ֆ. 34912, ց. 2, գ. 300, թ. 10:

¹¹ «Կարմիր զինվոր», 5. VII. 1927:

¹² ՍՐՊԿԱ, ֆ. 34912, ց. 1, գ. 1497, թ. 2:

¹³ Նույն տեղում:

¹⁴ ՍՐՊԿԱ, ֆ. 34912, ց. 2, գ. 300, թ. 10:

¹⁵ «Краснознаменный Закавказский», М., 1969, стр. 17.

¹⁶ 1931 թ. հոկտեմբերին դիվիզիան դարձավ լեռնահրաձգային:

ռավարության կողմից: Դիվիզիայի 10-ամյակի կապակցությամբ, 1931 թ. հունվարի 14-ին ՆՍՍՀ Կենտգործկոմի նախագահության և Ժողկոմսովետի որոշմամբ 66 հրամքադաշխատողներ պարգևատրվեցին «Տասնամյակի նշանով»¹⁷:

Մարտական և քաղաքական գերազանց պատրաստությամբ 1931 թ. աչքի ընկավ դիվիզիայի 2-րդ լեռնահրաձգային գունդը (հրամանատար-կոմիսար՝ Ա. Ա. Հովակիմյան), որը հաղթող ճանաչվելով ԿԿԲ-ի ազգային զորամասերի միջև կազմակերպված սոցիալիստական մրցության մեջ, արժանացավ Բաքվի սովետի կողմից սահմանված փոխանցիկ գրոշին: Հաջորդ տարին գունդը դարձյալ հաղթող ճանաչվեց: 1933 թ. երկրորդ անգամ անընդմեջ հաղթող ճանաչվելու համար դրոշը ընդմիշտ հանձնվեց 2-րդ գնդին¹⁸: Համառ պայքարով ձեռք բերված նվաճումների համար գունդը նույն թվականին արժանացավ նաև ՀԼԿԵՄ Կենտկոմի փոխանցիկ գրոշին¹⁹: 1934 թ. մարտին ՀԿ(Բ)Կ IX համագումարին տված իր հաշվետու զեկուցման մեջ Կենտկոմի առաջին քարտուղար Ա. Խանջյանն ասաց. «Հաշվետու ժամանակաշրջանում դիվիզիան էլ ավելի է ամրապնդվել: Անձնակազմի բարոյա-քաղաքական վիճակը գտնվում է բարձր մակարդակի վրա: Այս տարի ռազմահեղափոխական խորհրդի հատուկ տեսչական հանձնաժողովը, ստուգելով դիվիզիայի մարտական և քաղաքական պատրաստության վիճակը, տվեց լավ գնահատական: Սակայն դա չպետք է հանգստացնի հրամանատարներին և քաղաշխատողներին... 1934 թ. դիվիզիայի հիմնական խնդիրը պետք է լինի վերացնել դեռևս նկատվող թերությունները և հաջորդ տեսչական ստուգման ժամանակ մարտական և քաղաքական պատրաստության բոլոր ցուցանիշներով արժանանալ գերազանց գնահատականի...»²⁰:

1934 թ. աշնանը տեղի ունեցած տեսչական ստուգումների ժամանակ դիվիզիայի մարտական և քաղաքական պատրաստության ընդհանուր վիճակին տրվեց գերազանց գնահատական²¹: Դիվիզիայի զորամասերի մեջ, առավել բարձր ցուցանիշներով, առաջին տեղը գրավեց երրորդ լեռնահրաձգային գունդը (հրամանատար-կոմիսար՝ Ս. Ասոյան, քաղօգնական՝ Ս. Ղահրամանյան)²²:

Դիվիզիայի ձեռք բերած մեծ հաջողությունների կապակցությամբ ԿԿԲ-ի հրամանատար Մ. Կ. Լևանդովսկին ողջույնի հեռագիր ուղարկեց դիվիզիայի հրամանատար-կոմիսար Հ. Թ. Աթոյանին: Այնտեղ ասված էր. «Մտանց ուրախ եմ դիվիզիայի մարտական պատրաստության փայլուն արդյունքներով... Հավատում եմ, որ գերազանց նվաճումները, որպես դիվիզիայի պատվավոր նոր կյանքի սկիզբ, կհանդիսանան զորամասերի համար ավանդույթ՝ աշխատելու, սովորելու և մարտնչելու, որտեղ էլ լինեն և ինչ պարագայում էլ գտնվեն, միայն գերազանց ու գերազանց ցուցանիշների համար»²³:

17 ՏՆ՝ «Կարմիր դինվոր», 15. I. 1931.

18 ՍՔԳԿԱ, ֆ. 34912, ց. 1, գ. 1083, թ. 9:

19 ՄԼԻ արխիվ, ֆ. 48, ց. 4, գ. 301, թթ. 12—14.

20 Նույն տեղում, ֆ. 1, ց. 22, գ. 1, թ. 40:

21 ՏՆ՝ «Կարմիր դինվոր», 24. IX. 1934.

22 Նույն տեղում:

23 Նույն տեղում:

1935 թ. տեսչական ստուգումների ժամանակ դիվիզիայի բոլոր զորամասերը մարտական և քաղաքական պատրաստության գծով դարձյալ ցույց տվեցին գերազանց ցուցանիշներ: Ձեռք բերած նվաճումների համար ՍՍՀՄ Կենտգործկոմի նախագահության 1935 թ. դեկտեմբերի 2-ի հրամանագրով հայկական դիվիզիան կոչվեց Կ. Ե. Վորոշիլովի անունով²⁴: ՀՍՍՀ 15-ամյակի կապակցությամբ, 1936 թ. հունվարի 7-ին ՍՍՀՄ Կենտգործկոմի նախագահությունը շքանշաններով պարգևատրեց հանրապետության 14 առաջավորների, որոնց թվում էին նաև հայկական դիվիզիայի առաջին լեռնահրաձգային դնդի հրաձգային ջոկի օրինակելի հրամանատար Մամիկոն Շահբաջյանը, որն ստացավ Պատվո նշան շքանշան, իսկ դիվիզիայի նախկին զինվոր, Ղափանի պղնձահանքերի անվանի հանքափոր Մինաս Պապյանը՝ լենինի շքանշան²⁵:

1936 թ. մայիսի 29-ին ՍՍՀՄ Կենտգործկոմի նախագահությունը դաշնակների դեմ մղված պայքարում ցույց տված մարտական քաջագործությունների, հայկական ազգային ռազմական կադրեր աճեցնելու գծով տարած աշխատանքի, մարտական ու քաղաքական պատրաստության գործում ունեցած հաջողությունների համար, Կ. Ե. Վորոշիլովի անվան հայկական լեռնահրաձգային դիվիզիան պարգևատրեց Կարմիր դրոշի շքանշանով: Դիվիզիայի հրամանատար-կոմիսար Հ. Թ. Աթոյանը, քաղբաժնի պետ, բրիգադային կոմիսար Խ. Հ. Աբրահամյանը, երկրորդ լեռնահրաձգային զնդի հրամանատար-կոմիսար, կապիտան Ռ. Խ. Հովակիմյանը և առանձին տանկային վաշտի կրտսեր հրամանատար Ս. Ե. Ուլյանը պարգևատրվեցին Կարմիր աստղի, իսկ հրետգնդի մարտկոցի հրամանատար, կապիտան Ա. Գ. Հակոբյանը, առանձին հեծյալ էսկադրոնի հրամանատար-կոմիսար, ավագ լեյտենանտ Վ. Ս. Վարդանյանը, III լեռնահրաձգային զնդի վաշտի հրամանատար-քաղզեկ, ավագ լեյտենանտ Ն. Գ. Սաֆարյանը, առաջին զնդի ադրբեջանական վաշտի դասակի հրամանատար, լեյտենանտ Ա. Ս. Փիրիևը, երկրորդ զնդի քրդական վաշտի ավագ Հաջոյե Ջալիլը, ավիաօդակի մոտորիստ Ե. Ե. Մելքոնյանը, առաջին զնդի պարաշյուտային գործերի հրահանգիչ Գ. Գ. Սարգսյանը և կապի վաշտի կարմիր բանակային Վ. Ռ. Հովհաննիսյանը՝ Պատվո նշան շքանշանով²⁶:

Նույն թվականի հուլիսի 17-ին Անդրկովկասյան զինվորական օկրուգի ՌՀԽ-ի հրամանով հայկական դիվիզիան ստացավ 76-րդ անվանումը²⁷:

1936 թ. հաջողությամբ անցկացնելով ամառային ուսուցման շրջանը և աշնանային ղորաշարժերը, դիվիզիան տեսչական ստուգումների ժամանակ դարձյալ արժանացավ բարձրագույն գնահատականի: Ամփոփելով 1936 թ. դիվիզիայի ձեռք բերած նվաճումները՝ Հ. Թ. Աթոյանը ԲԳԿԲ-ի 19-ամյակին նվիրված հանդիսավոր նիստում հայտարարեց. «Եվ այսօր մենք հպարտությամբ կարող ենք նշել, որ ամբողջ ԲԳԿԲ-ում, կրակային պատրաստության բնագավառում գերազանց ցուցանիշներ ունեցող դիվիզիաների շարքում, հայկական դիվիզիան գրավում է V տեղը, իսկ մարտական հրաձգության բնագավառում՝ I տեղը²⁸:

24 ՍՐՊԿԱ, ֆ. 25873, ց. 6, գ. 279, թ. 140:

25 ՏՃՍ «Կարմիր զինվոր», 9. I. 1936:

26 «Известия», 30. V. 1936.

27 ՍՍՀՄ ՊՄԱ, ֆ. 51, Գ2Դ, ց. 1, գ. 2, թ. 3:

28 «Կարմիր զինվոր», 23. II. 1937:

1938 թ. մարտի 7-ին Համկ(բ)Կ ԿԿ-ն և ՍՍՀՄ ԺԿԽ-ը որոշում ընդունեցին՝ ազգային զորամասերը վերակազմավորելու մասին²⁹։

76-րդ դիվիզիան վերակազմավորումից հետո դարձյալ մնաց Հայաստանում։

Հայրենական մեծ պատերազմի առաջին օրերին, դիվիզիան համալրվելով, ձեռք բերեց իր նախկին ազգային տեսքը. նրա անձնակազմի կեսից ավելին հայեր էին³⁰։ Այնուհետև «նա միշտ գործել է ռազմաճակատի ամենակտիվ տեղամասերում և պատերազմի պատմության տարեգրության մեջ գրել ոչ քիչ փառապանծ էջեր», — նշել է դիվիզիայի նախկին հրամանատարներից՝ բանակի գեներալ Վ. Ա. Պենկովսկին³¹։

76-ая АРМЯНСКАЯ ДИВИЗИЯ В 1922—1940 гг.

К. А. АРУТЮНЯН

Р е з ю м е

В рядах 76-ой армянской стрелковой дивизии выросли прославленные военачальники: маршал Советского Союза И. Х. Баграмян, маршал бронетанковых войск А. Х. Бабаджанян, генералы: С. С. Мартиросян, Б. И. Арушанян, Г. А. Тер-Гаспарян, С. И. Гиносян, А. Г. Карапетян, Н. Г. Сафарян, Г. О. Мартиросян, А. А. Казарян и многие другие.

Дивизия родилась в Армении в годы борьбы за утверждение советской власти, окрепла в битвах гражданской войны, возмужала в годы мирного строительства и прошла славный боевой путь в годы Великой Отечественной войны.

В мирные годы дивизия активно участвовала в социалистическом строительстве, одновременно сохраняя свою высокую боевую и политическую подготовку, за что в 1935 г. ей было присвоено имя маршала Советского Союза К. Е. Ворошилова, а в 1936 г. наградили ее орденом Красного Знамени.

В годы Великой Отечественной войны дивизия была удостоена гвардейского звания, а также награждена орденом Ленина.

²⁹ См. «КПСС о Вооруженных Силах Советского Союза, документы, 1917—1968», М., 1969, стр. 294.

³⁰ ՍՐՊԿԱ, ֆ. 25873, ց. 6, գ. 369, քք. 2—4 և ՍՍՀՄ ՊՄԱ, ֆ. 51, 727, ց. 1, գ. 17, ք. 29։

³¹ ՀՍՍՀ ՀՀՍԾ ՊԿԱ, ֆ. 688, ց. 3, գ. 37, քք. 1—8,